

ԱՐԵՎԵԼԱԶԱՅ ԹԱՏԵՐԱԳՐՈՒԹՅԱՆ ՍԿԶՐԱՎՈՐՈՒՄԸ ԵՎ ԱՌԱՋԻՆ
ԹԱՏԵՐԱԿԱՆ ՕՋԱԽԸ ԹԻՖԼԻՍՈՒՄ

ԱՐԹՈՆԵ ՏԱՏԻՆՅԱՆ

Արևելահայ դրամատիկական նոր թատրոնի մի շարք խնդիրներ այսօր լրացուցիչ ճշտման և պարզաբանման կարիք ունեն։ Դրանցից կարևորագույնը արևելահայ թատրոնի սկզբնավորմանը վերաբերող վկայություններն են։ Ըստ մի քանի հայտնի աղբյուրների, Թիֆլիսում հայկական առաջին ներկայացումները տեղի են ունեցել անցյալ դարի 20-30-ական թվականներին։ 1828 թ. Թիֆլիսի ներսիսյան դպրոցում Հարություն Ալամդարյանը, աշակերտների ուժերով, թատերական ներկայացումներ է կազմակերպել¹։ Սակայն այդ թատերականացված հանդեսները չեն կարող նոր թատրոնի սկիզբ համարվել, քանի որ դրանք պարզապես դպրոցական ուսուցման ավանդական ձևերից են եղել։

Այսօր էլ փաստի ուժ ունի հիշողություններով ավանդված մի այլ տեսակետ, ըստ որի արևելահայ նոր թատրոնի սկզբնավորման տարեթիվը համարվում է 1836-ը ե առնչվում Գալուստ Շիրմազանյանի անվան հետ²։ Սա, ինչպես ժամանակին նկատել է թատերագետ Սարգիս Մելիքսեթյանը, «տակավին չհաստատված մի տեղեկություն է», որը նա չի փորձել ապացուցել³։ Անցյալ դարի 90-ական թվականներին և մեր դարասկզբին հայ թատրոնի անցյալով հետաքրքրվող բանասերները ոչինչ չեն ասում այս մասին։ Եվ ահա, մեր դարի 30-ական թվականների սկզբին ավանդական տեղեկությունն անցնում է Արամ Երեմյանի «Ռուսահայ թատրոնի պատմության» էջերը որպես հավաստի տրվել⁴, իսկ մեր օրերում ընդունվում է որպես տարեգրական փաստ։ Ասվում է, որ Շիրմազանյանը 1836 թ. Թիֆլիսի իր սեփական տան դահլիճը վերափոխելով, ստեղծել է առաջին թատերական շենքը քաղաքում և սկիզբ դրել հայկական առաջին ներկայացումներին⁵։

Այսպիսով, մեր առջև ոչ թե սոսկ մասնակի հետաքրքրություն ներկայացնող մի հարց է, այլ շափազանց կարևոր՝ XIX դ. առաջին կեսի հայ թատերագրության ու թատրոնի ուսումնասիրության տեսակետից։ «Շիրմազանյան դարբաս» կոչվող թատերաշենքը իսկապես առաջինն է Թիֆլիսում։ Բայց ե՞րբ է հիմնվել և ինչպես։ Անհրաժեշտ է քննել բուն իրավիճակը և հնարավորին շափ հստակել հայ նոր թատրոնի սկզբնավորման ջրջանի այս հետաքրքիր երևույթը։

Արդ, ո՞վ էր Գալուստ Շիրմազանյանը և ի՞նչ անհրաժեշտությամբ ըստեղծվեց նրա անվան հետ կապված «Շիրմազանյան դարբասը»։ Գալուստ Շիրմազանյանը արևելահայ նոր մտավորականության առաջին սերնդի ներկայացուցիչներից է։ Չափազանցում չի լինի, եթե ասենք, որ Շիրմազանյանի ձեռնարկարդրությունը ինչ-ինչ գործից...» կատակերգությունը պատմականորեն բացառիկ է։ Շիրմազանյանի կենսագրական մանրամասները մեզ չեն հասել։ Նա ծնվել է 1807 թ. պարսկահայ վաճառական Հարություն Վարդանյանի ընտանի-

1 Բ. Հարությունյան, XIX—XX դարերի հայ թատրոնի տարեգրություն, հ. 1, Երևան, 1982, էջ 11—12։

2 «Հայկական սովետական հանրագիտարան» (այսուհետև՝ ՀՍՀ), հ. 8, Երևան, 1982, էջ 487։

3 Գ. Չաչկյան, Իմ հիշատակարանը, Երևան, 1953, էջ 182։

4 Ա. Երեմյան, Ռուսահայ թատրոնի պատմությունը, հ. Ա, Վենետիկ—Ս. Ղազար, 1973, էջ 95—96։

5 Բ. Հարությունյան, նշվ. աշխ., էջ 487։

բում⁶, 1818-ին Հարությունն իր ընտանիքով գաղթում է Նոր Նախիջևան, այնուհետև Ներսես Աշտարակեցու հրավերով 1820-ին տեղափոխվում է Թիֆլիս։ Հարություն Վարդանյանը եղել է պարսից շահի մատակարարը, և այդ գործը հետագայում անցել է նրա որդիներին։ Բարձր գնահատելով Հարությունի ծառայությունները, պարսից շահը նրան շնորհել է «Շիրմազան» պատվանունը, որ բառացի թարգմանվում է «առյուծազարմ»։ Վարդանյան ընտանիքի համար դադարձել է տոհմական ազնվականության տիտղոս և հետագայում վերածվել ազգանունի⁷։ Թիֆլիսում Հարությունի որդի Գալուստ Վարդանյան-Շիրմազանյանը աշակերտել է Պողոս վարդապետ Ղարաղաղուն, որը 1822 թ. ուսուցչություն էր անում քաղաքի կենտրոնական Տափթաղի վանքի խցերում⁸։ 1825-ի սկզբին նրա անունը, իր եղբայրներ Աղաջան-Հովհաննեսի ու Գևորգի անունների հետ միասին, տեսնում ենք նորաբաց Ներսիսյան դպրոցի առաջին վաթսուներեք աշակերտների ցուցակում⁹։ Այդ ցուցակում են նաև խաչատուր Աբովյանը, Ստեփանոս Նազարյանը, Ստեփանոս Ներսիսյանը (ապագա նկարիչ) և հետագայում ճանաչված ուրիշ անուններ։ Դպրոցի տեսուչ Հարություն Ալամդարյանի հրատարակած «Երախայրիք Ներսիսյան դպրոցի» խորագրով աշակերտական ալմանախում կարդում ենք պատանի Գալուստ Շիրմազանյանի բանաստեղծությունները¹⁰։

Շիրմազանյանն իր առաջին պիեսը գրել է 1826 թ., երբ Թիֆլիսում դեռևս թատրոն չկար, և նրա տեսած կրթական միջավայրում դրա գաղափարն իսկ անհայտ էր։ Ուրեմն, ինչ ճանապարհով էր դրամատիկական ձևի պատկերացումը հասել նրան։ Դիմենք իր վկայությանը. «Բարեհիշատակ Պողոս վարդապետն Ներսիսյան, որուն հանգուցյալ Մեսրոպ Թաղիադյանցն ու Ստեփանոս վարդապետն Նազարյանց Ղարաբաղցի անվանեն, Թիֆլիսի Ներսիսյան վարժարանումն դասատու էր հայկաբանության, 1826 թվին հինգերորդ դասատան աշակերտացն (յորոնց մինն էս էի) սկսեց ճարտասանության դաս տալ, հրամայեց աշակերտացն մին-մին վիպասանություն գրել»¹¹։ Ինչպես տեսնում ենք, դրամա, պիես կամ Թատերգություն բառերն անծանոթ են եղել, և նույնիսկ տարիներ անց Շիրմազանյանն իր առաջին թատերագրական փորձն անվանում է վիպասանություն։

Որպես շարադրության նյութ տասնյոթամյա աշակերտ Գալուստն ընտրում է հին Նախիջևանում կատարված մի դեպք, որին ականատես է եղել մանկության օրերին։ Շարադրությունը նա վերնագրել է «Ասրի բեկ և Գիքի»։ Մանթանալով թեմային, Պողոս վարդապետը խստորեն ասում է. «Այս պատմությունը քո խելքի բանը չէ»։ Շիրմազանյանի արխիվում պահպանված է եղել շարադրության ձեռագիր օրինակը՝ Պողոս վարդապետի դիտողություններով։ «1860 թ. մին օր, — գրում է Շիրմազանյանը, — Թավրիզու մոտ Զինդանար գյուղում հին թղթերս պառտելույս ժամանակ, ձեռս ընկավ իմ երեսխալության ժամանակումը գրած և հանգուցյալ Պողոս վարդապետի սրբագրած վերոհիշյալ վիպասանությունը։ Նույն ձմեռն մնալով Զինդանար գյուղումն, գիշերները Երկար լինելով մտքումս դրի պարապ ժամանակս էս աղգային անցից վերապարապել»¹²։

⁶ Տե՛ս 202, հ. 8, էջ 487։

⁷ Գ. Բ. Շիրմազան, Մի քանի էջ հայկական թատրոնի պատմությունից (Ենոյեմբերյան, 1932, № 1, էջ 171)։

⁸ Պ. Հակոբյան, Խաչատուր Աբովյան, Երևան, 1967, էջ 177—178, 217—218։

⁹ Նույն տեղում, էջ 177—178։

¹⁰ Գ. Շիրմազանյան, Նկարագրությունք ինչ-ինչ գործոց... [«Մատենադարանի դիտական նյութերի ժողովածու», № 2, Երևան, 1950, էջ 99 (այսուհետև՝ ԳՆԺ)]։

¹¹ Գ. Շիրմազանյան, Ասրի բեկ և Գիքի («Կոռնկ Հայոց աշխարհի», Գ տարի, դեկտեմբեր, 1862, էջ 897)։ Պողոս վարդապետի անունը որոշ ժամանակակիցներ (նաև Շիրմազանյանը) կրթման շփոթել են, անվանելով Ղարաբաղցի շինվելով՝ Պ. Հակոբյանի «Խաչատուր Աբովյան» աշխատության վրա, ճիշտ ենք համարում Պողոս Ղարաբաղցի գրությունը։

¹² Նույն տեղում, էջ 899։

Կարծիքներ կան, որ «Ասորի բեկ և Գիթին» նախ գրվել է արձակ, որպես վեպ, և հետագայում միայն հեղինակն այն վերածել է դրամատիկական շարադրանքի: Աս. Սնացականյանը գրում է. «Շիրմազանյանի գրական առաջին ծավալուն գործը եղել է մի վեպ՝ գրված 1826 թվին՝ Պողոս Ղարադաղցի վարդապետի առաջարկով, որի հիման վրա հեղինակը 1860 թվին գրել է իր «Ասորի բեկ և Գիթին» պիեսը»¹³: Համոզիչ է արդյոք այս կարծիքը: Պատասխանը գրտնում ենք պիեսի նախաբանում. «...նախ սկսեցի թատերգությունս արձակ շարադրությամբ շարունակել»¹⁴: Հեղինակը գրական իր առաջին շարադրանքն անվանում է «Թատերգություն»: Հետևաբար, դա արձակից արված բեմականացում չէ, այլ սկզբից իսկ գրվել է տրամախոսությամբ և մշակվել ու ավարտվել 1860 թ.: Հարց է առաջանում՝ ինչու է դպրոցական շարադրությունը դրելով տրամախոսական եղանակով: Նկատի առնենք, որ տրամախոսությունը դպրոցական ուսուցման մեջ ընդունված է եղել որպես ճարտասանական խոսքի կառուցման ձև՝ միջնադարյան դպրոցից եկող ավանդություն¹⁵: Դրամատիկական արտաքին ձևի գաղափարը Շիրմազանյանն ուներ թատերական արվեստին առնչվելուց անկախ: Ներսիսյան դպրոցի հիմնադրման շրջանում Թիֆլիսում թատրոն չկար: Պողոս վարդապետին հուզել էր ոչ թե շարադրության արտաքին կերպը, այլ թեման: Տրամախոսությունը ճարտասանության ուսուցչի համար միանգամայն հասկանալի եղանակ էր: «Թատերագրություն» բառը հետագայում է մտել գործածության մեջ:

Այսպիսով, Շիրմազանյանի «Ասորի բեկ և Գիթին» պիեսը հայ թատերագրության պատմության մեջ իմաստավորվում է որպես 60-ական թվականների ազգային-ազատագրական ձգտումների մի դրսևորում: Բեմադրվելու մասին, սակայն, որևէ տեղեկություն չունենք: Անհամեմատ մեծ է նրա «նկարագրությունը ինչ-ինչ գործոց...» պիեսը, որը գրված է հայ թատերագրության համար բոլորովին նոր՝ կոմեդիա-պամֆլետի ժանրով: Մխիթարյան հեղինակների պատմական ողբերգությունների և բարոյախոսական մի քանի կատակերգությունների ֆոնի վրա ստեղծվում է սոցիալական կատակերգության թերևս առաջին օրինակը՝ հայ դրականության մեջ՝ ժամանակի արևելահայ լեզուների միատեղ գործադրումով, մատավորապես նույն շրջանում կամ ավելի վաղ, քան Արուսյանը: Շիրմազանյանը ակամա կամ մտադրված դառնում է իր ժամանակի կյանքի ինչ-ինչ բնորոշ կողմերի քննադատողը: Պիեսում նա ի հայտ է բերում հայ կղերականության հոգևոր ու բարոյական անկումը՝ կաշառակերությունը, ստորաբարձությունը ուսուստիճանավորների ու իշխանաձորների առջև և այլն: Պիեսը չի տպագրվել, արտագրվել է և գաղտնի տարածվել: Հեղինակի անունն անգամ հրապարակելը մեծ համարձակություն էր, քանի որ անխուսափելի էին դատն ու բանտարկությունը:

Շիրմազանյանի պիեսի առաջին հիշատակությունը գտնում ենք Մարկոս Աղաբեկյանի «Հայ թատրոնի անցյալը» հոդվածում¹⁶: Այս հիշատակումը չունի իր վավերականությունը հաստատող այլ աղբյուր կամ զուգահեռ. որևէ տվյալ: «Կարելի է, որ թվականի և անունների մասին շփոթեմ, — գրում է Մ. Աղաբեկյանը, — դրանց որոշ հիշելը անկարող լինելով, այդ մասին ներողություն եմ խնդրում պարոնանցը: Թիֆլիսում առաջին անգամ թատր հորինող է լինում, նույնիսկ Թիֆլիսու հայոց կյանքը վեր առնել պարոն Գալուստ Շիրմազանյանը...: Իր թատեր առարկան է սաել նույն քաղաքի առաջնորդ Կարապետ եպիսկոպոսին, որ երբեմն առաջնորդ եղավ բազմաթիվ հայոց ոչ միայն հովվելու, այլ և քրիստոնեից մեղրաբուխ երկիրը տանելու, որպեսզի լույս տեսնան այնտեղ: Առարկա է արել նաև էջմիածնի սինոդն ու Հովհաննես կաթողիկոսը, ուսաց կառավարությունը, Թիֆլիսու հայոց ժողովուրդը և այլն:

¹³ Գնժ, էջ 99:

¹⁴ Գ. Շիրմազանյան, նշվ. աշխ., էջ 899:

¹⁵ Հմմտ. Հ. Հովհաննիսյան, Թատրոն. հին և նոր արժեքներ, Երևան, 1986, էջ 67:

¹⁶ Մ. Աղաբեկյան, Հայ թատրոնի անցյալը («Փորձ», 1879, № 10, էջ 63):

Թեև հետաքրքրական կարողացել է անել յուր հատվածը, այն ժամանակի եկեղեցական անկարգ ընթացքը դուրս բերելով, ամեն մեկ գավառցի հայն յուր բարբառով խոսեցնելով, ոռոսաց կառավարիչները կաշառակեր ցույց տալով, բայց հատվածի նպատակն ավելի մի պարսավ է յուր հանդես դուրս բերած անձինքների վերա, քան թե նրանց բնական պատկերը... Այդ եղելովթյունը տեղի է ունենում 1836 թվերում: Թատրը խաղացվում է, ասում են, առաջին անգամ նույնիսկ հեղինակի տանը մի դարբասում մի կամ երկու տարուց հետո: Իմ գիտցածն՝ այդ կերպով է սկսում թատերական նոր նիստը Թիֆլիսում հայոց մեջ¹⁷, ինչպես նկատել է Աս. Մնացականյանը, «այստեղ նույնիսկ խոսք չկա պիեսի հորինման մասին»¹⁸: 1836-ը Կարապետ եպիսկոպոսի՝ Վրաստանի և Իմերեթիայի հայոց հոգևոր թեմի առաջնորդ լինելու սկիզբն է և ոչ պիեսի ստեղծման տարեթիվը: Իսկ բեմադրության տարեթիվի մասին խոսք լինել չի կարող:

Աս. Մնացականյանը Շիրմազանյանի պիեսի երկու ձեռագիր օրինակները գտել է Երևանի Մատենադարանում (ձեռ. № 3045, 8810) և ցույց տվել պիեսի հորինման տարեթիվը՝ 1841 կամ 1842¹⁹: Մատենադարանի 3045 ձեռագրում նշված 1841 թիվն անգամ ստույգ չէ, քանի որ պիեսում վերադարձվող դեպքերը հասնում են մինչև 1842 թիվը: Աս. Մնացականյանը փաստորեն ուղղում է մտքերը արևելահայ թատրոնի սկզբնավորման շրջանի տարեթիվերում, և, այնուամենայնիվ, 1836 թիվը մտել է հայ թատրոնի տարեբաժան մեջ, իսկ Գալուստ Շիրմազանյանը համարվել է ներկայացումների կազմակերպիչ և Թիֆլիսի քաղաքագլուխ 1836-ին²⁰:

Տարեգրական արձանագրման աղբյուրների մասին կարելի է միայն էն-թաղովթյուններ անել, քանի որ հեղինակը դրանք չի նշել: Ոչ մի աղբյուր չի երևում նաև Արամ Երեմյանի «Ռուսահայ թատրոնի պատմությունը» աշխատությունում: «1836 թվին, — գրում է հեղինակը, — «Շիրմազանյան դարբասում», ո՛ր պիեսն է բեմադրվում, ովքեր են առաջին դերակատարները, տարաբախտաբար չունինք փաստական տվյալներ: Այսքանը միայն պարզ է, որ 1836 թվին ներկայացվում է կենցաղային մի պիես: Դրա հեղինակն էր Գալուստ Շիրմազանյանը»²¹: Հաջորդ տողերում, սակայն, Ա. Երեմյանը ենթադրովյունից անցել է հաստատման, տվել երկու պիեսի ու երկու ներկայացման գաղափար: «Միայն այս ներկայացումից հետո, — գրում է նա, — Շիրմազանյանը ստեղծում է սուր սատիրական մի պիես (սկզբնապատկերին ինչ-ինչ գործոց...)» — Ա. Տ.), որտեղ առաջին անգամ հայ թատերական գրականության մեջ տեսնում ենք ոռոս չինովնիկներին: Այն թեման, որ նա նշմարել էր պիեսում, միանգամայն նորովյուն էր հայ թատրոնական գրականության մեջ. Պիեսն առաջին անգամ խաղացել են 1836 թվին, հենց հեղինակի՝ Գալուստ Շիրմազանյանի դարբասում, սահմանափակ հանդիսատեսների նեղ շրջանում»²²:

Ա. Երեմյանի միակ աղբյուրը Մ. Աղաբեկյանի «Հայ թատրոնի անցյալը» հոդվածն է, որտեղ, ինչպես տեսանք, խոսվում է մեկ պիեսի մասին և բերվում է մեկ տարեթիվ՝ 1836, որը Կարապետ եպիսկոպոսի՝ Վրաստանի և Իմերեթիայի հայոց հոգևոր թեմի առաջնորդ դառնալու մոտավոր ժամանակն է՝ Աղաբեկյանի հիշողությամբ: Ի դեպ, Աս. Մնացականյանի ճշտումից հետո հայ թատրոնի պատմության վահարամ Թերզիբաշյանը համոզվել և ընդգծել է, «որ

17 Նույն տեղում, էջ 63:

18 Գնթ, էջ 101:

19 Նույն տեղում:

20 Բ. Հատրնություն, նշվ. աշխ., էջ 14: Սակայն հիշենք, որ Գալուստ Շիրմազանյանը քաղաքագլուխ է դարձել առաջին անգամ 1862 թ., երկրորդ անգամ՝ 1865 թ.:

21 Ա. Երեմյան, նշվ. աշխ., էջ 95—96:

22 Նույն տեղում:

պիեսը հորինված է 1841-42 թվերի ընթացքում և ոչ ուշ²³։ Թվում է, թյուրիմացությունը պետք է արդեն կանխվեր։

Վերադառնանք սակայն Շիրմազանյանի կենսագրությանը։ 1832 թվին նա հոր գործերով մեկնում է Թավրիզ²⁴։ Սկսվում է պարսից շահի երիտասարդ մատակարարի անհանգիստ կյանքը։ Միայն 1862 թվականին (իր վկայությամբ՝ 1863-ին) նա վերադառնում է Թիֆլիս և նույն տարում էլ ընտրվում քաղաքագլուխ²⁵։ Այս շրջանում էլ հրատարակվում են նրա երեք պիեսները։ Ուշիդ երեսուն տարի Շիրմազանյանի ծառայողական կարիերան Թիֆլիսից դուրս էր և կապված էր Պարսկաստանի ու շահի պալատի հետ։ Իսկ այդ ընթացքում շատ բան էր փոխվել Անդրկովկասի քաղաքական ու տնտեսական կյանքում։

1863 թվականին Թիֆլիսում գործում էին Պերճ Պողոսյանի և Գևորգ Չմբշկյանի թատերախմբերը, որոնցից և ոչ մեկը չի անդրադարձել Շիրմազանյանի պիեսներին։ Համանաբար պատճառը այդ պիեսների դրամատուրգիական կառուցվածքի թուլությունն էր։ Շիրմազանյանի թատերական անփորձությունն ակնարկում է Մ. Աղաբեկյանը. «Անփորձ թատերական արվեստում։ Մակարծել է, թե թատր ձևացնել կամ թե մի անցք կամ դեպք խաղի առնելը միայն մի քանի անձիքների միջում մի խոսակցություն է հարկավոր սարքել...»²⁶։

Տպավորությունն այն է, թե Շիրմազանյանի պիեսները գրված են ոչ թե բեմադրվելու, այլ ընթերցվելու համար։ Դժվար չէ ապացուցել, որ հեղինակը վատ գիտեր բեմը։ Նրա կատակերգության մեջ կան նշագրումներ²⁷, որոնց իրականացումը բեմում անհնար է։ Սրանք տեխնիկական խնդիրներ են։ Նկատի առնենք հասարակական իրավիճակը։ Կարապետ եպիսկոպոս Բագրատունին մինչև 1856 թիվը թեմական առաջնորդ էր, և Վրաստանի հայոց կրթական կյանքը՝ նրա հովանավորության ու հսկողության տակ էր։ Այդ օրերին ո՞վ և ինչու պետք է սուր ճոճեր Կարապետ եպիսկոպոսի դեմ։ Հայտնի է մի բան, որ ռուս պիեսի ձեռագիրն այն ժամանակ գաղտնի էին տարածում, իսկ ոստիկանությունը փնտրում էր նրա անհայտ հեղինակին։ Կարապետ եպիսկոպոսը դիմել էր ոստիկանությանը՝ պիեսի հեղինակին գտնելու և պատժելու²⁸։

Բոլոր հիմքերն ունենք մտածելու, որ Շիրմազանյանի կատակերգությունը 40-ական թվականներին չի բեմադրվել Հարություն Շիրմազան Վարդանյանի. «Դարբասում»։ Հավագույն դեպքում դա կարող էր լինել պիեսի ընթերցում։ Նկատենք նաև, որ Գալուստ Շիրմազանյանի թղթերում ոչ մի ականակ չկա բեմադրության մասին։ Բերենք Գալուստ Շիրմազանյանի եղբորորդու՝ Վասիլ Շիրմազանյանի հուշերից մի հատված, որն անուշադրության են մատնել հայ թատրոնի պատմության ուսումնասիրողները. «Ըստ եղած տեղեկությունների (դրանց՝ մասին պատմում էր հայրս) այդ երկը փորձել են ներկայացնել Շիրմազանյան տան դարբասում, որտեղ և մոտ 20 տարի անց տեղի ունեցան հայկական առաջին ներկայացումները»²⁹։ Ուրեմն, ոչ թե ներկայացրել են, այլ փորձ են արել ներկայացնելու։ Այս տեղեկությունն ավելի հավանական է թրվում։

Կենսագրական փաստերը վկայում են, որ 60-ական թվականներին Գալուստ Շիրմազանյանը հետաքրքրություն չի ցուցաբերել թատրոնի հանդեպ։ Լինելով Թիֆլիսի քաղաքագլուխ, նա ոչ մի մասնակցություն չի ունեցել հայ

23 Վ. Թերզիբաշյան, Հայ դրամատուրգիայի պատմություն. 1668—1868, Երևան, 1959, լ. 260—261։ Հեղինակը, շունենալով որևէ վկայություն, այն մտքին է մենում, որ 1820—40-ական թվականներին «Շիրմազանյան դարբասում» եղել են հայերեն ներկայացումներ (ա՛հա նույն տեղում, էջ 265)։

24 Գ. Շիրմազանյան, Նյութեր ազգային պատմության համար։ Երևելի հայկազունքի Պարսկաստան, Ռոստով, 1890։

25 Տե՛ս ՉՍՀ, հ. 8, էջ 487։

26 Մ. Աղաբեկյան, նշվ. աշխ., էջ 63։

27 Գնթ, էջ 149, 163, 164։

28 Գնթ, էջ 100։

29 Գ. Շիրմազանյան, նշվ. հոդվ., էջ 172։

ազգային թատրոնի ստեղծման գործին, որի կենտրոնում էին Պ. Պոռչյանը, Մ. Պատկանյանը, Հ. Կարենյանը, Գ. Զմշկյանը: Նրա անվանը շենք հանդիպում թատրոնը ֆինանսավորող հոգաբարձուների ցուցակում: Ավելին. 1862-65 թվականներին, «Շիրմազանյան դարբասում» ընդամենը մեկ ներկայացում է եղել, որը, ըստ Բ. Հարությունյանի կազմած տարեգրության, տեղի է ունեցել 1864 թվի սեպտեմբերի 7-ին³⁰: Վերջապես, 1893 թվին Թիֆլիսի քաղաքային թատրոնում մեծ շուքով տոնվել է հայ բեմի 35-ամյակը³¹, Հորելյանի կազմակերպիչները հայ թատերական կյանքի սկիզբ են համարել Հ. Գուրգենբեկյանի «Հաշի Սուլեյման» կատակերգության ներկայացումը 1858 թ. Մոսկվայում: Իսկ այս ներկայացման 50-ամյակը Թիֆլիսում տոնվել է 1908 թվին³², Թատրոնին, նաև մոտավոր անցյալի դեպքերին մոտ կանգնած մարդիկ ինչու՝ չեն հիշում 1836-ը, այլ քսաներկու տարով գալիս են այս կողմ:

Այնուամենայնիվ, երբ և ինչպես ստեղծվեց «Շիրմազանյան դարբաս» կոչվող թատերասրահը: Դիմենք Վասիլ Շիրմազանյանի պատմածին³³:

Շիրմազանյան ընտանիքի հայրը՝ Հարություն Շիրմազան Վարդանյանը, գալով Թիֆլիս (1820 թ.), Մոզնի եկեղեցու մոտ մի երկհարկանի տուն է գնում: Շենքը գտնվում էր «Մեծ ծուռ» կոչված փողոցում (այժմ կերմոնտովի փողոց): Տունը սկսվում էր Վելյամինովսկայա փողոցի (այժմ՝ Չենկաձեի փողոց) աջ անկյունից և իջնում մինչև Աբաս-Աբաթյան հրապարակ, որը մինչև այժմ գոյություն ունի նախկին շափերով, հիշեցնում է մեծ բակ և սովորական հանգրստավայր է տեղի բնակիչների համար: Լայնարձակ բակի կողմից կիսակլոր աստիճանները տանում էին դեպի մեծ կամարակապ դահլիճը, որը կոչվում էր «դարբաս»: Դա հայտնի «Շիրմազանյան դարբասն» էր, որ հաճախ հիշատակվում է հայ (նաև վրաց և ռուս) թատրոնի պատմության մեջ: Դահլիճը իրենից ներկայացնում էր 30-32 մ մի շինություն, որի բարձրությունը 8-10 մ էր: Դահլիճի առաստաղը հենվում էր ընկուզենու փայտից շինված երկու սյուների վրա, պատերը զարդարված էին պարսկական զարդանախշերով: Կենտրոնում կախված էր բյուրեղապակյա շքեղ ջահը: Տունը քանդելու ժամանակ դահլիճի առաստաղին հայտնաբերվել են 1502 կավե սափորներ, որոնք դրված են եղել դահլիճի ռեզոնանսի համար: Ժամանակակիցների կարծիքով, տունը եղել է քաղաքի հնագույն ճարտարապետական կոթողներից մեկը:

Ըստ մեզ հասած տվյալների, «Շիրմազանյան դարբասը» որպես թատերասրահ առաջին անգամ օգտագործել է Թիֆլիսի ռուսական թատերախումբը: Կովկասի փոխարքա կոմս Վորոնցովը իր վրա է վերցրել տեղի ժողովուրդներին կրթելու «առաքելությունը»: Նրա նախաձեռնությամբ է սկսվել հետազայում քաղաքային թատրոնի կառուցումը Նրևնյան հրապարակում, հայ մեծահարուստ Գաբրիել Թամամշյանի միջոցներով (բացումը՝ 1851 թ. նոյեմբերի 8-ին)³⁴, «Ասելով Շիրմազանյան դարբասի մասին, — գրում է Վասիլ Շիրմազանյանը, — Վորոնցովը անձամբ ուզում է տեսնել այդ շենքը: Իմանալով Վորոնցովի ցանկությունը, Վարդանը (Գալուստ Շիրմազանյանի եղբայրը — Ա. Տ.) մեծ պատրաստությամբ ընդունում է Վորոնցովին: Վերջինս ներկայանում է ներսես կաթողիկոսի հետ և շատ է հավանում շենքը: Նա առաջարկում է անմիջապես ժամանակավոր թատրոնի վերածել «դարբասը»: Դահլիճում տեղավորում են մոտ շորս հարյուր աթոռ և հարմարեցնում մի քանի օթյակ»³⁵:

Ինչպես տեսնում ենք, Վորոնցովի առաջարկած վերակառուցումից հետո է միայն տան դահլիճը վերածվել թատերասրահի: Դա եղել է անկասկած 1845 թ. հետո, քանի որ Թիֆլիսի ռուսական թատերախումբը սկսել է գործել 1845 թ.

30 Բ. Հարությունյան, նշվ. աշխ., էջ 62:

31 Նույն տեղում, էջ 336:

32 Լ. Բաբայան, Ռուսահայ թատրոնի 50-ը («Գրական-դիտական ժողովածու», Թիֆլիս, 1908, էջ 104):

33 Գ. Ր. Շիրմազան, նշվ. հոդվ., էջ 172:

34 Բ. Հարությունյան, նշվ. աշխ., էջ 19:

35 Գ. Ր. Շիրմազան, նշվ. հոդվ., էջ 172:

սեպտեմբերի 20-ից, Մանեֆի 350 տեղանոց դահլիճում³⁶։ Մինչ այդ Թիֆլիսում հրապարակային ներկայացումներ չեն եղել, եթե չհաշվենք տնային ու դպրոցական ներկայացումները, օրինակ՝ Գրիբոյեդովի «Խելքից պատուհասի» բեմադրությունը հայ, ռուս և վրաց թատերասերների նախաձեռնությամբ, իշխան Ռոման Բաղրատիոնի տանը³⁷։ Վկայություններ չունենք հաստատելու, թե խաչատուր Աբովյանի «Խաղարկություն մանկանց» դպրոցական կատակերգությունը և «Ճեղգորա կամ որդիական սեր» սենտիմենտալ դրաման 1841-ին ներկայացվել են «Շիրմաղանյան դարբասում»³⁸։ «Դարբասը» թատերասրահի է վերածվել Աբովյանի՝ Երևան մեկնելուց երկու տարի անց։ Մինչ այդ Աբովյանը, ներսիսյան դպրոցում սովորելու տարիներին, մտերիմ էր Աղաշան Շիրմաղանյանի հետ, լինում էր նրանց տանը, հետագայում էլ նամակագրական կապ է ունեցել³⁹, բայց թատերական գործը հետագայում է սկսվել։

1851 թ. Թամամշյանի թատրոնը (ճարտարապետ Ի. Սկուդիերի) արդեն պատրաստ էր, և ռուսական թատերախումբը թողնում է «Շիրմաղանյան դարբասը»։ 1855 թ. «դարբասը» վարձում է Կիրիսելիձեի ղեկավարությամբ կազմված վրացական թատերախումբը⁴⁰։ 1859 թ. միայն հայ թատերախումբը, Միքայել Պատկանյանի ղեկավարությամբ, մուտք է գործում Շիրմաղանյանների դահլիճ։ Ոչ մի տեղեկություն չունենք, թե այստեղ 1859-ից առաջ ինչ խումբ է գործել կամ ինչ ներկայացում է տրվել հայերենով։ 1859 թ. ամռանը հայ գիմնազիստներից կազմված մի խումբ մասնավոր մի տան դահլիճում բեմադրել է Ստեփանոս Մանդինյանի «Պետրոս և Բարբարե կամ Հայքի Վրաստան» պիեսը։ Հուլիսի 26-ին ներկայացումը կրկնվում է «Շիրմաղանյան դարբասում»⁴¹։ Ներկայացման մասնակից Ջաքար Գրիգորյանը գրում է, որ իրենց հաջողվել է վարձել այդ դահլիճը տաս ռուբլով⁴²։ Վկայությունը կոնկրետ է ու հավաստի։ «Պեդրիկ տնային թատրոնը» գործել է մինչև 1861 թ. մարտի 4-ը։ Սա Պատկանյանի վերջին ներկայացման օրն է։ Մամուլը պահպանել է Պատկանյանի ֆինանսական օգնությունն աղերսող հողավածները։ Խումբը ցրվել է, վաճառվելով թատրոնական գույքը, մի կերպ վճարելով պարտքերը և հազիվ խուսափելով քրեական պատասխանատվությունից⁴³։ Պատկանյանի խմբին գուզենթաց այստեղ ներկայացումներ է տվել նաև Թիֆլիսի առաջին գիմնազիայի աշակերտներից կազմված մի խումբ, որի մեջ եղել է Գալուստ Շիրմաղանյանի եղբորորդին՝ տասնհինգամյա Վասիլ Շիրմաղանյանը։ «Բեմում շինված էին թախտեր, զարդարված զորգերով, — պատմում է Վասիլը։ — ... հանդիսականներից շատերը գալիս էին սեփական մթերքներով, մանավանդ համբարները կաղամբի մեջ փաթաթած խավիար, թոնգանոցներով կարմիր գինի, կաղին և գրպանները ածած զանազան չոր մրգեր։ Ընդմիջումներին համբարները խմում էին կարմիր գինին բացականչելով կենացը թե այն դերասանների, որոնց խաղը քապավորություն էր թողնում նրանց վրա, և թե այն պատմական հերոսների կենացը, որոնք բեմադրվում էին այդ օրը...»⁴⁴։ Ժամանակի թատերական կենցաղը ներկայացնող շատ պերճախոս տեղեկություն է տալիս Վասիլ Շիրմաղանյանը։ Համբարները, որ Թիֆլիսում «Ղեյնորա» կոչվող հրապարակային թատերախաղերի կազմակերպիչներն ու մասնակիցներն էին, դառնում են դրամատիկական թատրոնի ամենաակտիվ հանդիսականները, այն համբարները, որոնք հետագայում՝ 1865 թվի հունիսի 28-ին,

36 Բ. Հարությունյան, նշվ. աշխ., էջ 15։

37 Նույն տեղում, էջ 12։

38 Նույն տեղում, էջ 14։

39 Ե. Աբովյան, ԵՊԺ, հ. 10, Երևան, 1961, էջ 428։

40 Տե՛ս ՇՄԸ, հ. 8, էջ 487։

41 Բ. Հարությունյան, նշվ. աշխ., էջ 29։

42 Զ. Գրիգորյան, Երիտասարդական հիշողություններ («Հուշարար», գիրք 9, Թիֆլիս, 1913, էջ 20—22)։

43 «Դեղու Հայաստան», 1861, № 40, էջ 410։

44 Նույն տեղում։

ըմբոստացան իրենց շահերը ոտնահարող քաղաքագլուխ Գալուստ Շիրմազանյանի դեմ և ավերեցին նրա տան երկրորդ հարկի մի մասը, փչացնելով նաև թատերասրահը⁴⁵, որտեղ վերջին հայերեն ներկայացումը տեղի էր ունեցել 1864 թվի սեպտեմբերի 7-ին («Արա Գեղեցիկ և Շամիրամ»)⁴⁶։ Վասիլ Շիրմազանյանի հուշերից պարզվում է, որ թատերախումբը կոչվել է «Խենթերի խումբ», և բեմադրված առաջին պիեսներից մեկը եղել է Ա. Սուխով-Կոբլինի «Կրեչինսկու հարսանիքը»⁴⁷։

Այսպիսով՝ արևելահայ պրոֆեսիոնալ դրամատիկական թատրոնի կազմավորման նախնական ջրջանը կապվում է Թիֆլիսի Աբաս-Աբաթյան հրապարակում եղած «Շիրմազանյան դարբաս» թատերասրահի հետ։ Այստեղ է սկիզբ առել արևելահայ նոր թատրոնը։ Ավանդությունը քաղաքագլուխ Գալուստ Շիրմազանյանին է դրել գործի գլուխ, մինչդեռ այստեղ երևում են Վարդանի, ապա նրա եղբորորդի Վասիլի անունները։ Իսկ Գալուստ Շիրմազանյանը մնում է արևելահայ նոր թատերագրության սկզբնավորողներից մեկը և իր նշանավոր պամֆլետ-կատակերգությամբ ունի իր պատվավոր տեղը հայ դրամայի և Արմավյանի ժամանակից սկզբնավորվող աշխարհաբար գրականության մեջ։

ФОРМИРОВАНИЕ ВОСТОЧНОАРМЯНСКОЙ ДРАМАТУРГИИ И ПЕРВЫЙ ТЕАТРАЛЬНЫЙ ЦЕНТР ТИФЛИСА

АРПИНЕ ТАТИНЦЯН

Резюме

Процесс формирования драматургии восточных армян относится к 20—30 гг. XIX в. Первыми деятелями нового театра восточных армян были А. Аламдарян, Х. Абовян, Г. Ширмазанян. В 40-х гг. XIX в. создаются пьесы Х. Абовяна, которые, по неподтвержденным сведениям, были поставлены в театральной зале «Ширмазанян дарпас». Но история «Ширмазанян дарпас» как театрального помещения, согласно летописи, начинается не с постановок пьес Х. Абовяна, а намного раньше—в 1836 г.

Зачинателем театрального дела принято считать видного общественного и театрального деятеля—Галуста Ширмазаняна. Он известен в истории армянского театра как драматург, а также как основатель первого действующего театрального помещения «Ширмазанян дарпас» в Тифлисе. Самое значительное из его драматических произведений—памфлет-комедия «Описание кое-каких дел епископа Карапета...». Это первый образец армянской социальной комедии. Существует предание, что она была поставлена Галустом Ширмазаняном на сцене «Ширмазанян дарпас» в 1836 г. С этого, согласно традиции, и начинается история театра «Ширмазанян дарпас». Первые армянские спектакли, действительно, были организованы в зале «Ширмазанян дарпас», но не в 1836 г., а в 1859. Это подтверждает множество фактов, а также племянник Г. Ширмазаняна—В. Ширмазанян. Первые сведения о переоборудовании залы дома Ширмазаняна связаны с именем наместника Закавказья графа Воронцова. По его приказу лишь в 1845 г. в зале «Ширмазанян дарпас» была построена театральная сцена. К делу создания театра «Ширмазанян дарпас», как видим, Г. Ширмазанян остается не-причастным.

45 Գ. Չմշկյան, նշվ. աշխ., էջ 182։

46 Բ. Հարությունյան, նշվ. աշխ., էջ 62։

47 Գր. Շիրմազան, նշվ. հոդվ., էջ 175։ Սո ալսոր ընդունված է կարծել, թե «Կրեչինսկու հարսանիքը» առաջին անգամ բեմադրվել է 1865 թ. հունվարի 12-ին Թիֆլիսի քաղաքային թատրոնում (Բ. Հարությունյան, նշվ. աշխ., էջ 65)։